

katechismus — z nich džěci, hdžež so to z cyła stawa, tež serbski čitać wuknu.

Zapis duchownych kóždeje wosady, z kotrejež móžach jón dostać, sym jenò wot l. 1750 podať, dokelž su wšitcy, kiž běchu do toho časa, hižo nadrobno zapisani w knizy: Kurzer Entwurf einer ob.-wend. Kirchenhistorie. Mjenow wučerjow sym přidať, kelkož móžach nazhonić.

Dokelž so tež we wjesnej towařšnosći a ludowej drasće wulki džěl narodneho žiwjenja wopokazuje, sym wo nimaj stajnje wosebiće a wobšěrně rečať.

Skónčnje sym při kóždej wosadze swójbne mjena Serbow a mjena wjesnych městnosćow a ležownosćow po móžnosći dospołnje znapisať, myslo sebi, zo budža wone hižo same na sebi někomužkuli zajimawe, přede wšěm swójbne; z nich hodži so póznać, kajke wšelake pomjenowanja swójbow su mjez Serbami wužiwane, z mnohich, kak žalostnje su poněmčene abo skepsane, ze wšelakich, kak rozšěrjeny tón a druhi serbski splah je; na přěnim městnje pak maju služić jako material za dalše řečespytne přepytowanja.

Wojerowski wokrjes.

I. (1. 2.)¹⁾ Wojerowska wosada.

Do Wojerowskeje wosady slušeju: a) město Wojerecy (Hoyerswerda), b) předměstka: 1. Hamtske Khěže (Amts-Anbau), 2. Podhród (Burglehn), 3. Haj (Haag), a c) 13 wsow: 1. Spale (Spohla), 2. Wulki a Mały Ćisk ze zwěrinjencom (Gross- und Klein-Zeissig mit Thiergarten), 3. Roholń (Riegel), 4. Bórk (Burg), 5. Kinajcht (Kühnicht), 6. Židžino (Seidenwinkel), 7. Hory (Bergen), 8. Nowa Łuka z bažantowej zahrodu (Neuwiese mit Fasanengarten), 9. Naré z Winicu (Nardt mit Weinberg), 10. Brětnja (Bräthen), 11. Michałki (Michalken), 12. Wulka a Mała Nydej z Winicu (Gross- und Klein-Neida mit Weinberg), 13. Lubuš z Nowym Lubušom (Laubusch mit Neu-Laubusch).

¹⁾ Tute ličby w spinkach pokazuja na rjad, w kotrymž su pod I. dž. wosady zapisane.